

梅亭丁巳年標準

庫 文 閣 內			
函	架	一九冊	一一七四二號
		特四十二類	漢書

合

內 閣 文 庫			
番 號	漢	11742	
冊 數		19 (6)	
函 號		3	5



国立公文書館
National Archives of Japan

梅亭先生四六標準卷之十一

新京城書藏

雜謝

代林運幹

良顯

謝丞相

書考求文字

千大播於一陶俾登畿幕積小成於三考獲進選
階頂踵歸塊土之功肝膽極輪囷之感敢因摧謝
更叙依歸伏念某材無瑜人學未聞道半世寒
之燈火中年大學之塵塩篆刻雕蟲覺兔毛之欲
禿銜枚戰蟻偶雞口之先鳴遂采魯芹出燃楚竹
未滿成瓜之代忽纏家棘之悲隙駒之制易終林
鳥之哺益切上書光範初無蟠木之先容得闕長

安乃辱采葑於下體竭來半載何有寸勞夏屋督
工粗逃曠敗春闈考士獲厠使令及大庭聞魁三
之傳則本房有筮貳之數然雖有依紅之樂尚未
霑破白之章七十偏親一則以喜一則以懼斗升
微祿時乎為養時乎為貧茫然寸步之謀甚矣分
陰之惜鼠肝蟲臂固難躁進以妄圖馬渤牛溲或
恐兼收而並蓄恭惟某官鼎彝家學袞冕世臣撫
五辰於泰階之平載萬物以坤元之厚復文武之
境已昭元老之壯猶歸鄆謹之田足見真儒之已
效然益旁招於俊又欲令聚在於闕庭故凡絲粟
之材未始蒯管之棄尚念某充身無策仰首自鳴
桃李成蹊自合安不言之分樓臺近水詎能忘先
得之情

代察判徐

愿

謝史丞相

得五帑文字

補京兆之掾曾微贊畫之長交公車之章茲拜成
終之賜自匪載驅於四牡何由一發而五紀毫髮
不假之他門頂踵皆歸於化冶有言雖淺進謝敢
稽伏念某才乏線長力尤綿薄十年太學身嘗百
壘之壘一第集英袍已半霜之葉昨終素鞞重累
洪鈞泛綠依紅猥使近長安之日草玄尚白誰肯

歲閭闔之風始焉一鷄之飛繼以乘鴈之集再而
衰三而竭孰與點睛二之下四之中正須合穎况
當百里九十之半更覺分寸千丈之強忽蒙雷電
下取之勞遂有埃風上征之路何物不由於洪造
此身獨拜於全功茲蓋伏遇某官八柱世臣三槐
家學方當鯉趨過庭之際已傳虎拜稽首之心更
化十六年無匹夫不被其澤闢國數千里復寧王
有拍之疆益闕翕受之規不廣旁招之意思里仁為
美似怜桑梓之偶同舉能其官特取蘋蘩之可薦
感一力挈提之厚增寸心銘鏤之私某敢不勉自

激昂圖惟報稱雞犬舐鼎難更干點化之功
颺景飲河當自詭承流之效感藏不盡敷述奚殫

代吳省倉

珙

謝丞相

維次

貧累清時許守漢倉之粟老須遠次忽臨齊戍之
瓜此恩夙出於大鈞於義宜伸於小牘伏念某身
勤事左意廣才踈家世占寶唐之濱學問皆環溪
之訓少而有志頗欲就博習修潔之科壯則無竒
亦屢玷德行道藝之貢歲不我與命與仇謀烏帽
黃塵凡五排於禮部青衫白首又兩進於計臺終
然蹉跎成此遲暮漫作兵厨之隱聊為簿竈之依

青天鳥道之拊膺雖嘗奏辟白水魚竿之入幕何
敢疾驅如此頭顱淒然脚色奚敢作堂除之夢猶
難干京局之除時方張更化之弦公實權造化之
柄冒為冶躍便辱甄收使守九年之儲令待四政
之闕楮梨橘柚大非老人所種之宜穉櫨侏儒偶
在宰相兼收之列聊裝鋪席歸老林泉不謂俟河
之清乃成縮地之脉洛中親舊書傳大耳之黃吳
下官曹事報烏頭之白僮奴欣怪里巷驚疑高下
在心只合避賢者之路進退維谷反恐負相國之
知尚堪一行不遠千里然非恃無垠之塊北亦寧

免將進而趨趨恭惟某官清任以和直方而大手
麾九日太陽行黃道之中坐鎮八年微物出洪鈞
之播雖風霆不言流形之利然天地能照許國之
心外撫四夷內熙百度收毛髮絲粟之細入竹頭
木屑之藏晉卿之舉七十家不遺筦庫祐甫之除
八百吏皆是舊知冒焉而來恃此無恐某敢不靖
共爾位洗濯其心却日揮戈收效在桑榆之景消
辰擁篲奉身歸桃李之門

代饒運幹 謝史丞相 改任

幹茗事於畚禺妾求易地贊漕輸於湘浦竟辱回

天俾依青草之湖庶免黃茅之瘴此恩渥甚何感
猶之伏念某樸學無竒散材不腆踏槐半世幾隨
兔目之黃采藻十年似守烏頭之白偶叨終秩未
及問鈞五嶺聞其皆炎初無去志諸公怜其獨冷
誤有辟書元戎欲處之油幢之中真宰遂寘之茗
寮之末等勤大播徑合疾驅惟是孤榮之蹤寸勇
尺懦實聞疫癘之地十室九空率爾陳情期於避
禍媒身無策難空冀北之士夫換骨有方乃綴湖
南之賓客獲避飛鳶之跼姑從檣燕之留茲蓋伏
遇某官秉國之鈞熙帝之載更政化當更之琴瑟

續聖賢難續之鼎彝益贊禹而格苗誕布舞干之
化尹相湯而伐夏迄垂典寶之書然猶耻溝中之
推必欲濟天下之溺印趣銷而趣刻足昭從善之
仁衣改造而改爲益表好賢之意某敢不敬其可
願欽乃攸司綠水紅蓮已感移栽之惠青芝赤箭
尚希並芟更之恩

代李總幹

伯長

改任謝史丞相

回馬首於藍亭不良擇地護鼠牙於粟庾有渥自
天當趨趨將進之間拜缺北無垠之賜謫焉孤賤
辱此一陶竊惟京口之積倉實切邊頭之仰哺總

司創闕裹粮兼坐甲之司堂選掄材弄印致閱時
之久蓋戰德戰謀之際惟去兵去食之難為米折
腰雖不離於祿仕數糠眯目易有誤於軍須必為
官而擇人庶因能而任職伏念某一寒無挾百拙
有餘伯父取之庭階補以京秩弟兄習乎弓冶志
在世科偶尺寸之蹉跎漫斗升之噉嚼中嬰家難
復詣吏銓煮海為盞妄欲供富媪之役無麪作餅
或謂非巧婦之能况當避嫌不免易闕自笑鮎魚
之上竹何翅羝羊之觸藩一指之不若人猥勤伯
氏之請匹夫之失其所亦闕造物之憐迄蒙倉庫

氏之除全出光範門之造恭惟某官鼎彝家學社
稷世臣巫賢之繼巫咸不但底王家之又伊陟之
紹伊尹真足格上帝之心雖九德敷施均不遐遺
而一門小大尤蒙器使烏鵲遶樹真同撼木之蚍
蜉牛羊求芻乃肯發機於鼯鼠某敢不修其可願
欽乃攸司錢穀甲兵問於廟堂當識士大夫之職
撰闌店楔成其室屋無忘明宰相之功

謝丞相書考

補上佐於黔嶺偶書下考貢空函於黃閣莫報實
恩偶暫攝於竹符尤倍希於樾蔭忘其喋喋布此

惓惓伏念某殖學踈蕪涉道短淺青泥盤足每思
範我之馳驅白雪滿頭寧復初心之邂逅進之犬
雞之效退從鹿豕之遊辱坏冶之一陶俾翱翔於
半刺牂牯為微雖非監螭螭之州盤瓠見容偶免
築鯨鯢之觀竹齋藥竈不礙雲山芝製荷衣無邊
風月適挈瓶之缺守又越俎而代庖胡瞻爾庭人
固疑其鶻突此非子坐自亦愧於象環所祈新尹
之疾驅庶遂陳人之退屏明年今日固可歸三涇
之荒凌雨震風尚合假萬間之芘恭惟某官得聖
之任為帝者師衡統紘緼增鼎鉉九九之重箕裘
乃治協泰階兩兩之符行由絕席之尊徑陟維垣
之峻人主聃論一相具瞻槐面之專太傅府有三
才詎棄竹頭之細所祈全度非異超遷某敢不補
拙以勤謹終如始深懲往轍路分寸而落千丈之
強雖踵常塗視九十為行百里之半其為歸倚罔
既敷宣

謝魏侍郎

了翁

為先祖先父作墓誌

先美無傳稟負子孫之責幽鑄有託蔚為祖考之
光屬拘柱後之文莫布堂下之武敬裁儼啓恪布
謝悰竊惟隧刻罕見於先秦之前墓碑似昉於後

漢之末正而斃斯亦已矣身將隱焉用文之如郭
林宗尚可免伯喈之愧若陶元亮又何待延年之
辭降逮李唐取崇韓柳韓銘正曜定非諛墓以攬
金柳表文通亦豈遺人之矻石蓋資良工之獨苦
有怜没世而不稱發其幽光時乃天道重惟先祖
父之孝不事今科第之謀一門千餘指之肅雍是
亦為政九流百三家之貫穿止以潤身不徒稱鄉
里之善人實有得名教之樂地維廉藺固不羨曹
蜎之無恙然夷齊要是得夫子而益彰恭惟某官
有德立言以文貫道粹若出六經之正凜然寒五
緯之芒寒芙蓉而賦詩洞識陰陽之消長傍梅花
而讀易詎忘天地之彌綸頗哀墜緒之茫茫恐與
常流而泯泯既取贊皇之實錄以誌楚金復叙奕
城之世家就銘明允仍加篆書八分之賜俾免不
稱三服之羞一門存亡百世感激某敢不昭告屏
攝表刻墓埏儻得保首領從九京之遊庶無泚面
目達中心之愧微薄不以廢其禮何足為碑板之
酬夙夜無忝爾所生用此為師門之報其為感鏤
罔既鋪菜

謝衛參政

涇

差校正書籍

小材出位願歸朱墨之勾稽大府量能留備丹鉛
之點勘少振塵埃之冗倍勤坏冶之陶竊以三館
文書固遴讎正編摩之選諸侯賓客率多獄訟財
賦之司寧有伺候公卿之門更容休息篇籍之圃
憐韓愈之非賤俾就閑官期呂蒙之讀書非爲博
士沫濡鮒轍啄抱鶴翎使養是氣而塞天地之間
將和其聲以鳴國家之盛知花於見根之始乞漿
有得酒之恩求之古人曷在今日伏念某少諧平
側長識偏傍不深石室之紬僅曉金根之讀遺經
獨抱未辨豕渡河之三良史博觀粗知馬与尾而

五有時北窻高卧之夢頗思東觀未見之書三神
渺在於海中五鬼難驅於坐上插架三萬軸但當
守鄴侯之書家集二百篇幸皆是撫州之寫然作
吏此事便廢亦有命焉惟投閑乃分之宜傷哉貧
也又留戲下宜在遣中遽冒小朝廷之除使策行
祕書之職茲蓋伏遇某官榮分湘閩並用楚材又
負偃植各安所施耻匹夫之弗獲椶闌店楔惟器
是適無一藝之不庸試黃閣之規模收碧油之人
物至如狂簡之小子亦勞块北之大鈞某敢不祇
此簡書呻其佔畢珥貂分陝已收下體之菲葑給

札登瀛願備一株之桃李

代表子固謝縣宰 寬假

筆楚之下何求知難全壁縲綫之中非罪乞就罰
金敢不持咫尺之書少謝寬一分之賜惟越人之
相攻擊蓋其俗然而長安之羣殺傷各有主者况
已過都而歷塊誠難被髮以纓冠儒者好高未免
為役而耻役隸也不力又可與言而不言但催科
未動是閑人豈期會不報為大政所謂行人失者
乃使吾身親之方入聞言偃之弦忽使受曾參之
杖主人讀未知主人罪也自怪其頑天下寶當為

天下惜之誰與此念惟體膚受之父母而衣冠耻
在國家馬遷腐刑何面上先人之墓孫臆刑足快
心蹶上將之軍故滕公釋韓信之囚而小白解夷
吾之縛知其不可復續所以寧失不經向使當時
淫及善人安得異日報以國士如某者詩書門戶
燈火生涯 非其職矣千乘之

邑百乘之賦切願學焉惟是受滕一墨敢辭于役
然且去齊二宿難疾其驅偶隣境之胥戕坐家人
之失告鶴非有祿徒以鶴警之失期鴈或不鳴要
亦鴈奴之有罪不虞投足卒禍及身業已逮於桁

揚勢難逃於撻楚自度受李日知之杖又當變余
安道之名然使撻之市朝得無傷於冠帶無小人
無君子宜玉石之俱焚有里胥有大夫

伏遇某官堯族俊德周家懿親粹然麟角之
祥屈此牛刀之試謂重士所以重國要當躡朝廷
長育之心知察獄先於察情又豈容胥吏上下其
手况開設學校方將馴化於鳴臬則愛惜人才何
忍鞭笞於鸞鳳致此爨餘之棄亦從金作之刑某
苟免益思學道以愛人儻許國之可期當措刑於
不式自此不復贖矣安用以撻記之鞭笞越而立
威名既知免於東海出鄒陽而為上客尚有望於
梁園

謝曹直學賀雨

伏以和巴歌之二闕遏雲足繼於謳青贈唐律之
七言喜雨宛同於醉白莫辦雙金之報徒深十襲
之藏

謝曹直學喜雨詩

伏以瘴我以早良窘望垂有志乎民厚書皇晷雨徒
切誦清風之穆未遑和白雪之高

回平江府沈侍郎送酒

杓斡龍躔日又賓於賜谷香凝燕寢地孰勝於蘇
州矧惟荷橐之賢宜介椒盤之祉恭惟某官德參
陰騭道配陽休奉行寬大之書爾絲免矣宣布中
和之樂襦袴煖然諒報政於吳門即歸班於魏闕
其一寒寘與獨冷何辭猶幸太歲之在申例容乞
酒遙祝壽星之出丙莫遂稱觴

回岳總領送酒賀正

天躔回甲聿新曆數之盼歲紀在申將應酒泉之
讖時維履使日進堪祺恭惟某官德配陽休功多
陰騭漕下水解師有宿飽之期掌上月升日佇辰
猷之告聊暫紆於羔袖即徑上於雞翹某家本一
寒官宜獨冷窮年兀兀只自慙廩粟之糜清夜沉
沉賴肯續燈花之酌

回新都廖宰送酒及石榴

伏蒙郇翰寵賁陶籬餉以乘壺定有可人之味侑
之碩果中存多子之祥續歡伯之風流洗醋兒之
酸楚已從竹葉獲觀令尹之清尚想榴皮可頌中
書之考

代回安撫趙尚書送物

共六尺之輿同寅良幸分丈二之組先甲已頌悵
遂告違顧勤亟餽惠而好我慚取數之孔多卻之
不恭敢下拜而登受區區衷謝續續面陳

又同前

一麾出守漸可解維同官爲寮蒙加折俎維多維
旨且感且慚敢貢記室之辭少致兵厨之謝

代回趙京尹餞送

已辭軒陛漸理舳舻更勤加餽之稠重采仍大寮
之篤叙既醉既飽腹不勝其屬饗載忻載奔面無
由而控謝

代回臨安府七夕送物

抱拙終身倦乞犬牙之巧未能免俗頗安犢鼻之
貧臺餽鼎來尹釐意厚酒醪醇壹况加雞柘之甘
餐餌馨香仍儻螺甲之旨備此四美跂彼七襄莫
宣銜戢之私但劇嚅噤之感

回塞學諭賀得粟九穗

一莖九穗昔嘗疑司馬之諛異壟同榮今顧辱昌
黎之頌雖君子之政不以物恠然太師於詩可見
民風要非于祥而于仁恨弗以規而以頌民曰太
守太守不有何敢當儒館之歌秀升司馬司馬辨

材請以旅天子之命

回李僉判賀瑞粟

某導九穗於漢庖此真偶爾歌五言之唐律何德當之不敢續貂恐譏集鵠唐叔之得同穎安敢望周公之歸劔南之進嘉禾亦難上柳子之表姑藏佳句以俟豐年

回王監酒提督修城

伏以三里之城不修則壞一日必葺欲罷不能擬煩督戊巳之屯相與營甲戌之築龍見而畢不妨節用以使民隼射于墉亦可待時而藏器

代回運使賀雪

黃雲紀瑞肇新魯觀之書白雪效祥造應梁園之賦能令公喜不在我先恭惟某官德配陽和氣排冬凜有功使臣歌四牡兼此二難省事天公厭兩回併成一賀方圖面慶又辱手牋不成報章尚幾幸察

回陳術士

某適勤枉顧寵異僂箋不但知五行之精抑又窺多文之富其為感佩罔既報酬

梅亭先生四六標準卷之十一

梅亭先生四六標準卷之十二

謝惠詩文

謝張祕校

晉臣

投詩

並代用湖

蒙以契家之舊贈之佳句之新昔人三百篇世寡
和矣古詩十九首君突過之但深中筭之藏莫效
檐榆之報

謝汪祕校

辛

惠詩

方味大篇又號長句冠切雲佩明月正自不凡濟
白水登閣風居然相導恭惟某官抱負奇志屈摺
壯圖文采離離猶可和其聲而鳴國家之盛詩律

坎坎何至虛其腹而藏天地之愁子亦來見我歟
僕未有可師者參橫月落不堪喚夢於羅浮目擊
道存何必相期於汗漫區區衷曲續續面陳

謝監鎮陸子適惠詩

今早特勤古風見畀句有家法信他日之聞詩老
無喜機羨故人之有子恭惟某官爽貫眉目清入
肝脾昌黎門庭未免金根之誤杜陵衣鉢僅存玉
案之吟郎君於此勉之放翁爲不亡矣某幸蒙委
重愧乏報嘉欲俎豆予我父周旋寧作我願金玉
女君家所有更贈君

謝林秘校季熊投詩

伏勤枉顧寵惠名篇曾前惠之未酬已厚章之游
至雲巢有子不孤珠玉之編月湖無詩可作瓊瑤
之報聊以數語寫此寸誠

謝盛登仕夢弼長書

寵示長牋就貽大冊非至篤好何能多如是耶所
謂立言亦甚似而幾矣愧乏檐榆之報徒華巾笥
之藏

謝許新恩裕惠詩

茲勤佳句良感高情或疑年使之年此事可念以

吾老及人老何力可施徒參患脚之禪莫救旋渦之佛

謝蘇秘教丙

杜門具奏方此乞骸叩戶論詩失於倒屣恭惟某官長材素蘊餘事清吟觀秋月之兩章羨春雲之多態天未喪斯文也復聞永嘉之音子亦來見我乎應認江西之派某亦聿旣毫兆足以行贈我綺琴之雙南之報答乞君霞珮請萬里以頡頏

謝程監丞準

荐勤真蹟加貺名篇對秋月之兩章仰春雲之多

態為施厚矣無謝可乎恭惟某官一世典刑三朝壽雋雖老子婆娑自安於橘顛然此翁矍鑠猶可
以蒲輪誰知幽桂之遺榛管坐令積雪之困桃李
咀冰嚼玉戲刻畫於無鹽洗醎傾樽巧噤吟於唐
舉惠而好我何以報公某久倚長松竟成小草借
君詩而消永夜自不成眠期吾王之召將軍更宜
善飯

謝朱新恩遜投書

比辱訪存特勤書况雖過情之可耻然荷意則甚
勤恭惟某官學踵乃翁氣吞餘子襟懷磊落不專

紙上之蟲魚談笑從容遂感草中之狐兔當季康
子患盜之日正班定遠封侯之時乃援古人以方
我輩一之為甚四者難并人豈不自知耶今願竊
有復也殺賊奴取金印何待明年縛單于寘橐街
更期他日

謝吉州楊司理彭年惠詩

比勤三顧寵惠六詩巧刻畫於無鹽力扶持於夜
燎不知所報當贈以言恭惟某官自策英躔宜收
名第青衫白首氣硤兀而未降丹筆墨曹翅翩翩
而方展不謂睡龍之寶猥加羅雀之門銜盃酒接
慙勤且承至止遣一介奉咫尺更幸亮之

謝周祕校醜之惠梅詩

叢桂移文問用倫之好在官梅動興笑何遜之重
來非吾之故人耶所見者今我也恭惟某官城市
大隱山澤真癯拍洪崖挹浮丘疑遊八極召鄒生
延枚叟又客諸侯茲辱顧存未遑迎肅終然不可
口過勤黃山谷之詩殊不類其人殆似宋廣平之
賦某甚安斗食焉用鼎羹月落參橫荷喚起羅浮
之夢水邊雪後願更續和靖之篇

謝會稽趙宰善韞

委刺見臨袖書為誓惟是事契之有素豈假文字而後明恭惟某官仕有長材政多善狀製劍池釀丹井又樂林居探禹穴上會稽猶須瓜戍雖淵明不辭五斗之屈然士元豈是百里之材兆足以行改之為貴某緬懷先契幸及英游主司疑則辨之此情可亮相國知之至矣何說之云

謝石祕校巖

比勤下顧寵示高文贈盈把之瓊瑤拜嘉已腴列成編之鍾磬取數何多恭惟某官水北名聲山西家世耻懷紉之簪笏服韋布之縑緗愴父機雲欲上規於姚姒衙官屈宋肯平到於陰何藉少低建隆之功勲足可備慶曆之諫諍公等安在吾道非耶遺我明珠皆映骨而睡驪目乞君飛佩會刺手而拔鯨牙某得非所蒙願竊有復文章小技計已空處士之羣節誼大閑願不替純臣之教

回劉進士

日起

惠書及封事藁

代月湖作

惠以長書將之奏藁一介而言天下古亦有之十漸之當帝心人誰辦此恭惟某人山澤志士畎畝忠臣范希文之居憂不忘國計張齊賢之獻策會即面陳某又已語離忽勤言贈吾愧之不敢恨也

徒抱朝飢公安在何見晚耶佇觀暮召

代回謝祕校耘投詩

代備參

寵投短刺就貺長篇梨非飢坐之珍豈能抵玉桃
匪蟠枝之實敢辱報瓊至於濁醪亦如惡札不敢
詠酌君之語乃先辱起予之詩占此奉酬察之良幸

回吳教授投啓和詩

伏勤巧思見和拙詩細窺秋月之兩章備見春雲
之多態迫斯可以見矣敢疑識面之遲忠焉能勿
誨乎安用過情之譽

代回朱上舍中有

餉以新詩價之舊藁蕭然四立之壁得此兼乘之
珠藏去爲榮不知所報恭惟某人曾蟠古學手抉
天章茲遙賦於高唐已洗空於下蔡詳味三四篇
之健語載觀十九首之遺音失餘子於牛毛發寒
光於驪目惠而好我雋甚逼人某愛莫助之顏之
厚矣開張篋笥諒無涓津筏之求劃豁垠崖所願
見琳琅之取

回前蘄春陳尉格惠詩

昨日伏勤古風見惠論交既久陳誼甚高恭惟某
官服襲典刑緒餘翰墨太丘遺愛多池上之鳳毛

季方難爲蓋眼中之犀角猶怜綠水紅蓮之舊客
曾陪碧梧翠竹之英游春容大篇刻畫老醜如猛
起約世故之句顧不偉歟抑擇術無小用之言猶
相憶否王何必假更爲綵捧之淹儒果用真會復
青氈之舊某過勤投壁莫辦報瓊登樓而憶侍郎
既無及矣拍廳而坐縣尉何幸見之

回張上舍

端道

博我以文竊承嘉惠愛人以德何至溢言請以屬
辭報其盛意恭惟某官勇高六館學綜九流觀其
崇論欲議之間眇然深思長慮之計以道相盥茲
意甚深覺民之先此言何爲至我任士之重所有
更以贈君某有幸納交願安承教凡是俎豆予之
意固已拜嘉亦有金玉汝之情尚幾見亮

回羅省元

垂琳琅於金薤得所未曾報瓊瑤以木瓜闕然無
有敢修儷語略謝盛心恭惟某官蘭菊之家梗枿
其質一經接踵不難俯拾於紫青萬卷蟠曾安得
長嘲於玄白時來爲耳人謂斯何有來秋月之兩
章足見春雲之多態然下有千歲苓之意雖東坡
尚不敢當至向來一瓣香之恭惟南豐乃爲無愧

其自知不武難與斯文借聽於聾求道於盲正恐
無益於賢者加膏而光養根而實其敢有愛於言乎

回熊省元投贈

漫刺下臨極慰仰高之想屬辭光賁能無投暗之
疑恭惟某官學富家傳美宜世濟桑弧有志豈徒
糊口於四方篳路何憂蓋將友士於千乘茲沐檐
褕之贈但深巾衍之藏某德愧多涼官甘獨冷厚
意慰蹉然之喜何敢或忘虛名誤賢者之來不知
所報

回徐殿幹暄投四六

登畿入幙榮不揜慚趨隅摳衣幸堪親教甫諧望
履端辱鳴謙藹然仁義之言既聞之矣豈以筋力
之禮望長者哉重勤四六之貽莫效萬分之報輒
裁狂簡少謝高明

代回張祕校子賢惠詩

比勤謁入尋辱詩來良深感荷之情敢虛往復之
義恭惟某官湖海豪氣風雲壯懷諫批逆鱗昔嘗
長太息者六工歌鳴鹿今將肄宵雅之三得句驚
人以文博我鄉言大好能無夜光暗投之疑民可
小康當在朝奏暮召之後

回吳判院北惠詩

榮被新除寵貽佳句脫身枳棘來監公子之倉回
首芙蓉寧戀假王之印我厭朝班之綴公方故步
之尋判院不比尋常惟當拭目山莊元無呵殿更
望垂情

回屈學正投書詩

丞哉負余余負丞哉殊乏吟哦之伴長者絕子子
絕長者抑何交際之遲振履鼎來鳴謙泰過恭惟
某官莫敖華胄正則故家宗派西江識快閣千山
之大僑居東鄙開遠軒三尺之明茲終素鞞之祥

行奉丹墀之對龍飛九五庚桑盍早於羸粮鵬擊
三千子木何勞於衷甲茲蒙布武見賁雄文加之
仁義之七篇華此蓬蒿之二徑不知所報藏去爲
榮某爲州治中在
固恨何相見之晚也猶
欲就有道而正焉友其士之仁子若無言幾失子
文以氣爲主君家所有更贈君

回呂將仕

某伏蒙紆顧寵賁長牋未先觀於景星幸茲小尉
辱暗投之明月復此大慚但深篋笥之藏莫效瓊
英之報

回衆官袖啓

伏蒙銜袖見賁儷牋合璧連珠於祭光芒之正編
鍾列磬了非世俗之音良欽墨妙以筆精但覺禮
踰而情過兩喜而多溢美曷克堪任七襄不成報
章但深愧負

回官員學職袖啓

洵承厚意疊貺儷牋墨妙筆精仰窺瞻麗禮踰情
迥洵極感慚嘗修造謝之恭僅奉留名之命惟息
肩之方始覺脫腕之頗勞七襄不成報章良孤隆
施兩喜之多溢美仰懼瀆辭

回學職士人

茲蒙盛刺見賁屬辭竊闕四六之工良重再三之
嘆亟嘗造謝僅辱留名退深巾衍之藏莫效檐榆
之報

回景省元

夙勤臨顧見賁儷牋偶缺肅迎退深誦味辱引前
賢之跡俾爲後學之師佩意甚勤拊躬曷稱尚規
晤語敬布謝忱

回宗子與銓

伏勤屢顧見畀屬辭極欽著語之工但重過情之

愧恭惟某人天潢濯秀風調軼羣上方重歆向之
材錫之蕃庶君宜勉賀白之學副此簡求佇觀千
里之駒亟振九苞之鳳某濫膺郡寄幸託里仁承
焚林竭澤之餘若爲共理有按薤置水之警切幸
告忠

回王省元

疑履迎門喜接雙鳧之馬文書銜袖辱摛孤鶩之
詞既見異人頓忘九折恭惟某人譚高玉塵材擅
瓊杯逃狗曲之譏暫且謝諸生而還舍依鹿鳴之
樂行當頌聖主之得賢結襪以須彈冠伊邇某十
年出幕兩談生巾甚苦月攘一雞之征無復人生
五馬之貴乏李膺之摸措誤辱肯臨範王良之馳
驅當圖請益

回李叔璋

伏蒙銜袖寵賁駢珠知爲河北之相家且接江西
之宗派欣逢若士何啻似人惟是過情之褒殆非
望賜之意它人不如同姓願聞按薤之規終日雖
則七襄莫稱投桃之報

回合同王將仕

茲蒙寵顧見畀雄文竊窺四六之工良重再三

感恭惟某官人門具美地位夙高淹回筦權之累
培益事功之會某過勤獎子彌切兢慙徒勞篋笥
之藏莫效襜褕之報

回王進士

伏蒙紆頤寵賁長書味藹如仁義之言知賢者深
遠之慮宿蠹正難於驟革頽瀾未易以亟回苟有
祝規更希忠告區區衷曲續續面陳

回黃將仕

伏蒙下顧揜賁長篇知宗派之由來信家風之不
墜見似人而喜真足慰蓬蓬之逃和此君之題會

更洗箏琶之俗

回王進士

茲佩高情見貽佳句歌刺史之頌愧非西京二千
石之良繫諸侯之風乃合召南十四篇之數報於
何有藏以爲榮

回楊貢士

伏以樂正論士而升之未皇請益公等何見之晚
也忽辱鳴謙非所宜蒙願竊有復恭惟某官詞章
炳蔚器度端溫得意狗監之官肯輕進取子雲羽
獵之賦行有吹噓試觀屬辭比事之文足見發策

決科之學其濫分守印獲託士鄉非浮橋之魚迫
斯可以見矣哀涸轍之鮒忠焉能勿誨乎

回蘇祕校材

吳蜀萬里夙知益者之多聞蘇李五言良愧倡焉
而寡和近古之三信在得名之雙謂何地下日月
光應察驥箱之服江空歲年晚誰爲馬口之銜

回史機宜大異

一門三秀未見長公之波濤七言五章始窺幼婦
之機杼喜故人之有子爲老成以賦詩但深巾衍
之藏莫效瓊瑤之報

回程祕校以南

辨蘆服之獄夙知續陰隲之功謁筵本之規未及
望陽休之色有勤枉駕更責屬辭伏惟某人德裕
乃身世濟其美待時藏器冠蜀都沈冥之珍它日
趨庭寔漢朝方正之學若爲公等之見晚真覺我
輩之厚顏某未皇欵門先辱傾蓋自衛尉將軍之
宿契是可通家藉翰林墨客以報章別圖問政

回見任官袖賀

承流支郡曾微牧御之方出節本朝誤被將輸之
命已伸免牘亟奉俞音敢圖銜袖之書特枉編鍾

之奏恭惟某官風猷俊茂天韻碩膚齒牙秋露之
甘手筆春雲之藹噓物以氣可回燕谷之温贈人
以言何翅楚珩之重遂令載馳載驅之任猥及不
狩不獵之夫某畏此簡書蕭然疲役某水某丘某
樹願歸遂於釣遊我任我輦我車希別謀於咨度

回史秘校公誨獻策

迷日五色智良愧於失人置水一盂惠足占於好
我屬辭爲教陳誼益高恭惟某人直哉史魚飄然
司馬遐想六王畢之作必無萬物茁之疑大樂正
詔王升諸宜登春講諸弟子隨臣久矣竟坐冬烘

敢謂愛忘不加督過有來論事益見憂時言言非
無益之談鑿鑿皆可行之策顧恨挈瓶之守不敢
越畔而思前茅中權今皆鄉人之善者積薪上寢
自可纓冠而救之幸疾其驅且忠以告某一麾乃
出再鼓而衰磨牙殺人未覺早還家之非計泣涕
陳策何待夜前席而後言

回楊普州

伯雨

袖詩啓

千古在前萬古後僕安知栗陸之書六字常語一
字難公真得栢梁之體所慙佳句適重愧情恭惟
某官氣抗岷峨文濯江漢子雲河東之賦天自吹

六九
嘯伯起關西之聲家傳清白所居民富而畏人知
行登鸚鷺之班安用蚍蜉之援金鑾論事之語何
至我哉鈞天無人之悲今召君矣

回趙進士

大正

大辱郇公之翰知為韓國之家社稷世臣自合襲
山河之爵箕裘夙學亦應遷俊造之班茲窺筆下
雲煙可見曾中之湖海願安承教不成報章

梅亭先生西六標準卷之十二

